

Kalaallit Nunaanni Eqqartuussiveqarnermut Isumalioqatigiissitat suleriaasissaat pillugu nalunaarut

Kalaallit Nunaanni eqqartuussisarnermik inatsimmi § 743, imm. 4 naapertorlugu, takuuk inatsit nr. 305 30. april 2008-meersoq, Kalaallit Nunaanni Namminersornerullutik Oqartussat isumaqatigiinniaqatigereerlugit Kalaallit Nunaanni Eqqartuussiveqarnermut Isumalioqatigiissitat suleriaasissaat imaattoq aalajangersarneqarpoq:

Kapitali 1

Isumalioqatigiissitat

§ 1. Kalaallit Nunaanni Eqqartuussiveqarnermut Isumalioqatigiissitat siunertaraat Kalaallit Nunaanni Namminersornerullutik Oqartussat naalagaaffimmilu oqartussaasut akornanni pinerluttulerinermi- aamma eqqartuussisarnermik inatsisit pillugit ataqatigiissaarisitsinermik suliaqarnissaq, ilanngullugu suliarissallugit tamatuma tungaatigut inatsisitigut tunngavissamik siuarsaaneq, taamaaliornermut atatillugu ilisimatusarnermik aallarnisaaneq kiisalu eqqartuussivinni oqartussaasut atasiakkaat sulinerinik aamma ilinniagaqarnissamik pisariaqartitsinerinik malinnaaviginninneq.

§ 2. Isumalioqatigiissitat siulittaasua ilaasortaalu toqqarneqartassapput Kalaallit Nunaanni eqqartuussisarnermik inatsimmi § 743, imm. 1-3 naapertorlugu.

Imm. 2. Isumalioqatigiissitap siulittaasua aamma ilaasortai, aalajangersakkat taaneqartut malitsiginngisaannik ilaasortaasut, ukiunut sisamanut sulisussatut toqqarneqartassapput. Toqqaaqqittoqarsinnaavoq.

§ 3. Isumalioqatigiissitat suleqatigiissitaliussapput isumalioqatigiissitat suliarisartagaasa iluanni ilisimatusarnermik tulluurtumik aallarnissaanissamik akisussaaffeqartussanik. Isumalioqatigiissitat aamma suleqatigiissitaliorsinnaapput sulinerminni atugassaminnik.

Kapitali 2

Siulittaasup suliassai

§ 4. Siulittaasooq allattoqarfimmik suleqateqarluni isumalioqatigiissitat sulinerannik aaqquissuussisassaaq, aamma siulittaasooq isumalioqatigiissitat ataatsimiinnerinik aqutsisassaaq.

Imm. 2. Siulittaasup aalajangertassavaa isumalioqatigiissitat ataatsimiinneriniit qanoq annertutigi-sumik imaqarniliuisoqartassasoq.

Kapitali 3

Allattoqarfik

§ 5. Inatsiseqarnermut ministereqarfik Kalaallit Nunaanni Namminersornerullutik Oqartussat suleqatigalugit isumalioqatigiissitat allattoqarnikkut ikiorsissavai.

Kapitali 4

Ataatsimiinnerit

§ 6. Isumalioqatigiissitat minnerpaamik ukiumut ataasiarlutik naapittassapput, tassani minnerpaamik ataatsimiinneq ataaseq Kalalalit Nunaanni ingerlanneqartassaaq.

Kapitali 5

Atortuulersitsineq

§ 7. Nalunaarut atortuulersinneqarpoq ulloq 12. december 2008.

Inatsiseqarnermut ministereqarfik, ulloq 9. december 2008

BRIAN MIKKELSEN

/ Jens Røn